

اشنو هي البشارة؟

القصة ديال النجا على حساب المعنى ديال الدّنب والبراءة.

الله قدوس وعادل. فكلشي لي كيدير، كيتعامل بتقوى كاملة. ماكيناش بلاصة للدّنب فالمحضر ديالّه. هاد الإله خلق الدّنيا كلها من والو.

خلق الله آدم وحواء وحطهم فجنة عدن (لي كانت فالأرض). عطاهم الحرية باش ياكلو من أي شجرة، وعلّمهم بتعليم واضح، «ماتاكلوش من شجرة وحدة – شجرة معرفة الخير والشر.» مّلي عصاو آدم وحواء وصيات الله، واجهو العقوبة – الموت الجسدي والروحي. وتعدّبو حيتاش عصاو الله. بسباب الفعايل ديالهم، تولد بنادم فحالة ديال الدّنب ومضاد مع الله والشرع ديالّه. الدّنب كيفرقّ الناس كاملين من الله القدوس. آدم وحواء تخرّجو من جنة عدن. عطا الله اليهود الشرع، لي كانو عنده جوج اهداف. لول، الشرع كيبين للناس بلّي ميمكنش يطبقو الشرع كلّه وحتياجهم للنجا. اليهود ماقدروش يطبقو كآع الوصيات ديال الله بقوتهم. الجهد ديال الناس ماعمرّو يوصل للمستوى ديال الله فالقداسة. التاريخ ديال اليهود فيه عصيان كيتعاود والعقوبة كتسناهم.

ولكن الشرع كانت عندو طريقة ديال كيفاش يتغفرو الدّنب. عطا الله واحد الطّريقة باش يكفرو الناس على دنوبهم. الطّريقة ديال الدّبايح ديال اليهود عطت لغفران بطّقس التّضحية ديال الحيوانات بلا عيب (اللاويين 17:22-25). عيد الفصح فالوقت فاش خرّج الله اليهود من مصر بين بلّي النجا ديال الناس من غضب الله بسيلان الدّم.

يسوع المسيح، ولد الله الوحيد، ولّى الدّبيحة الكاملة باش يتغفرو الدّنب د الناس. عاش يسوع حياة كاملة بلا دنب. وحيث كان بلا دنب، كان قادر يهز دنوبنا. كان يسوع خروف الله بلا عيب. تضرب بالمسامر على قبل دنوبنا وهز العواقب ديالها. الموت د يسوع فوق الصّليب غفر دنوبنا ولغا الحجة ديال الفرائض لي ضدنا. من بعد، تبعت يسوع من الموت وطلع للسما. كيني الله كنيسة بالناس لي كيتوبو من دنوبهم وكيامنو بيسوع. باش تولي تلميذ يسوع خاصك تعرف وتعارف بدنوبك كدّام الله بالتّوبخ ديال الرّوح القدس. حيث يسوع صالحنا مع الله، ابوا، ماكيناش فيدة فالمجهدات ديالنا باش نوصلو للكمال الأخلاقي. كنجاو بالإيمان، لي هو هدية ديال النّعمة من عند الله، ماشي بالقوة ديالنا. وحيثاش دنوبنا تغفرو خاصنا نسامحو لخرين. مّلي غيرجع يسوع للأرض، غيحكم الله على الناس كاملين بالعدل وغيعاقب على الدّنب. المودنيبين غيتعاقبو فجّهم ولّي متقيين الله غيكونو مع الله فالمملكة ديالّه على الدّوام.

القصة ديال النجا على حساب المعنى ديال الشرف والعار

قبل البدو، كايين الله واحد لي عامر بالمجد والعز. هو ملك مشرف، أب لي كيرزق العائلة كولها. هو طاهر، أمين، ومعزز – المنبع ديال الشرف الحقيقي.

باش يبين العز ديال الله، خلق الله الدنيا وأمر باش تكون حياة. خلق الله آدم وحواء من التراب وعمّره بالعز والكرامة. كانت عندهم السلطة باش يحكموا الخليقة حيث الله عطاهام الولاية باش يحكموا معاه. حيث كانوا ولاد الله، عاشو تحت إسم الله. ستمتع آدم وحواء بهوية مشرفة من عند الله. كانوا عريانيين بلا حشمة.

ولكن آدم وحواء عصاو الله. خلاو الشرف ديال الله باش يحاولو ياخذو الشرف ديال ريوستهم. وهاد العصيان ديالهم لله جاب ليهم العار. وتخبّأو وغطّأو راسهم. وبالذنوب ديالهم غلطو فحق الله. وماكرموش. حيث جابو آدم وحواء العار على كل واحد، خرّجهم الله من الجنة باش يحمي الكرامة ديال الله.

حيث حنا من تزكية آدم، ورتنا العار الأصلي ديالهم. ومن بعد، قلبنا ولا منجوس وگذار وكيزيد العار. هاد العار كيشكل هويتنا وسلوكنا. غالباً، الذنوب (مثلاً: العنف، الغضب، التّمية، التّكبر، العنصرية، الاعتداء، الحرب، إلخ...) هي محاولة باطلّة باش نغطّيو العار وندهيو شرف مزور. غالباً، كنصاوبو لريوسنا مكانة باطلّة ملي كنحتقرو لخرين وكنتكبرو بالتّفوق ديال المجموعة ديالنا. حيثاش كنقدو الكرامة الروحية ديالنا، عائلة روحية، إسم روعي، ومكانة روحية، كتولي حياتنا مجهودات باش نبنو شرف مزور. كيما كتكول لقصة ديال برج بابل، ناس كيحاولو يكبرو ريوستهم ويديرو إسم لريوسهم. العار ديالنا كيتسبب فسلوك خايب وكيهين الله. دار الله واحد الخطة باش يردّ الشرف ديال الإنسان. عاهد الله إبراهيم باش يشرفو بإسم عظيم، وأرض مزيانة، وبركة، وأمة، وبزاف ديال الولاد. عائلة إبراهيم، أمة عظيمة، غتولي طريق الله باش يبارك و يشرف كاع الأمم بيها. ملي تعدّبات تريكة إبراهيم فالعبودية فمصر، حرّره الله من عبودية مفضوحة. اليهود ولّأو أمة عظيمة، وعزاز على الله بزاف.

قطع الله عهد متميّز باش يشرف اليهود، إلا شرفو الله بولاء وطاعو شرع موسى. القوانين ديال شرع موسى طهرو اليهود من النّجاسة وخلّاهم يرجعو للمجتمع. واخا نوا الله من العهد يزيد الشرف، العصيان ديالهم لي كيتعاود هان الله كدّام الشعوب لي ماشي يهود. ملي عبدو آلهة اخرى، نقصو من الله فنصر الناس، بحال المرأة لي كتخون راجلها. حيث ختارهم الله، حساب ليهم بلي الشعب ديالهم حسن من كاع الشعوب – النّقى على حساب المجتمع وماشي على حساب نصر الله. ضنّو القيمة ديال الشعوب لي ماشي يهود قل من قيمتهم وماكيستهلوش يدخلو فالعائلة ديال الله. اليهود، بحال آدم، تختارو للشرف، ولكن ولّأو فمفنى مفضوح. واخا القصة ديال اليهود سالات بعار وطني، الوعود والمتول ديال الشرف من الله (مثلاً: راعوت، داوود، دانيال، وأستير) تنبأت بواحد العمل كبير ديال الله باش يعتق العائلة ديال الناس من العار وباش يردّ الاعتبار للناس.

واخا كان يسوع عندو العز من البدو وكان مشرف حيث هو ولد الله، ولّى يسوع بنادم متواضع باش ينجي الناس من العار. ودار معجزات ديال الشفاء وكلا مع المودنيين فطبلّة وحدة

باش يرجع الشان والشرف للناس لي ماشي مهمين فنضر المجتمع. حيتاش يسوع كان كيفيض من الشرف ديال الله، كل واحد لي مسّ يسوع ولّى طاهر ومقبول. التعلّم ديالّه عن القانون ديال الشرف الدائم والحقيقي. ملّي يسوع حبّ وقبل كل واحد واخا السمعة ديالّه كانت مزيانة ولا خايبة، ريب يسوع القانون ديال الشرف الباطل ديال المجتمع وقدم الشرف الحقيقي من الله للناس. يسوع عاش حياة زوينة لي عطّات العز لله مية فالمية.

ولكن خدمة يسوع هدّدت الشرف الأرضي ديال المسؤولين فهاداك الوقت. علاحقاش، حتقروه كدّام الناس وبطريقة خايبة بزاف. يسوع تشد، تعرّى، تعير، تجلّد، تدفل عليه، ضربوه بالمسامر، وتعلق على الصليب عريان كدّام الناس. تحمل العار بأمانة وهرّس القوّة ديالّه. الموت د يسوع فالصليب ردّ الإعتبار لله وحيد العار ديالنا. ورجع العز.

من بعد، بين الله كدّام الناس العز ديال يسوع والقبول ديالّه للموت د يسوع لي هز العار فاش بعنو من الموت. دابا، يسوع كالس على ليمن ديال الله المشرف وباسم فوق من كل اسم. آدم واليهود فشلو، أمّا يسوع نجح باش يكون إنسان حقيقي. الحياة ديالّه ردّت الإعتبار لله وللعائلة الإنسانية.

لي كيعاهد بالولاء ل يسوع كياخذ مكانة جديدة من الله. العار ديالّه كيتغطا والشرف كيتردّ. بنادم خاصّه يرفض ياخذ السمعة ديالّه من الناس ويبيني المكانة ديالّه لراسه باش يتيق فيسوع وياخذ مكانة جديدة. باش تكون فالعائلة ديال الله، ماشي على حساب التريكة، السمعة، والطهارة الدينيّة، ولكن على حساب النّقة فالمسيح لي تصلب. الله كيبدل المكانة القديمة لي هي موسخة، بلا قيمة، ويتامى ناقصين (بلا الله الحقيقي) بالمكانة الجديدة لي هي ولاد طاهرين، بقيمة، ومشرفين. وهادوك لي كيتبعو يسوع للصليب ديال العار، غيتبعوه للعز ديال البعت.

حيث الله كيرحب بينا فالعائلة ديالّه، حنا قادرين نرحبو ونقبلو ناس اخرين. حنا المسيحيين قادرين نشرفو اخرين ونعطيو العز لله حيث عندنا الشرف الدائم من الله وحيث عندنا الروح القدس لي كيقوينا. ملّي غيرجع يسوع، الله غيرعري الناس لي ماشي مومنين من الشرف الأرضي ديالهم وغيطردهم للعار الدائم. والله غيعطي للمومنين تيجان ديال الشرف الدائم. والعز ديال الله غيعمر الخليقة كولها.

القصة ديال النجا على حساب المعنى ديال القوة والخوف

فالبدو، الله، الخالق، خلق الدنيا بالكلام القوي دياله. الله كيحكم الخليقة كلها، السماوات والأرض. بالمحبة، كيحكم بالسلطة والقوة لي معندهمش حد. والخليقة كتسبح للقوة دياله. حيث خلق الدنيا باش تكون مملكته، كلف الله آدم باش يحكم الخليقة. كان آدم شريك الله فالولاية، الأمير ديال الخليقة. تعطات ليه السلطة باش يحكم الخليقة ديال الله، وهادشي باين فالحق دياله باش يسمي الحيوانات. حيثاش الله هو الملك لي كيحكم، كلف الإنسان باش يتسلط على الدنيا دياله.

فواحد الوقت، شي وحدين من الملائكة تارو ضد حكم الله السيادي. الشيطان، العدو، قاد تورة. إبليس خطط يجيب الإنسان تحت الحكم دياله باش يوسع القوة دياله لي ماشي شرعية على الأرض. اللقي الذكيّة غرات آدم وحواء باش تخرجهم من مملكة الله للحكم ديالها. القوّات لي كيضادومع الله سيطرو على البشر. العائلة ديال آدم خسرت المكانة ديال القوة والسلطة فالدنيا. ولّا الشيطان الحاكم والأمير. تولدنا فمملكته. ولّا العينين ديال بنادم معمين، وقبط الشيطان على قلبنا. الذنوب، الهجوم الرّوحي، وعبادة الأصنام، كيستعبدو الناس تحت القوّات المضلمات.

باش يرجع السلطة المطلقة على مملكته، ختار الله اليهود باش يوليوا الأداة المميزة دياله فالعرب الروحية. بالعلاقة المبنية على العهد معاهم، خطط الله يوسع السلطة على الأمم كاملين. ملي تعدبو اليهود فمصر، غلب الله الآلهة ديال مصر باش يحرر اليهود من العبودية ديال فرعون. الخروج بين القوة ديال الله للناس كاملين. الله هو المحارب والغالب القوي، والقوة دياله السماوية على الشرّ كتسبب النصر فالأرض. ملي عولو اليهود على الله، خلاهم ينتصرو واخا كانوا قل من العديان ديالهم. ولكن، غالبا، قلبو على القوة فبلايص باطلين. ستسلمو اليهود للتجربة ديال الآلهة الباطلة فالعبادة ديال الأصنام والأمور السحرية. فبلاصت يعولو على الربّ القادر على كلشي، دارو عهد مع الآلهة ديال كنعان والحكام ديال الأمم كبر منهم باش ياخذو الحمية والبركات. الأنبياء تنبأو وبينو التفوق ديال الله على الآلهة ديال كنعان، ولكن اليهود كانوا باقيين ما عندهمش القوة باش يهربو من التأثير ديال الشيطان.

القوة ديال الله لي كتحرر ولّات بنادم فيسوع. هو بدا مملكة الله لي واعد بيها شحال هادي. بالقوة ديال روح الله، قاوم يسوع العرض ديال الشيطان باش يحكم معاه وبقا يسوع متمسك باش يخرب المملكة ديال الشيطان. بواحد الطريقة لي معمرها كانت قبل، حرر يسوع الناس لي كانوا عبيد ديال الشيطان. فاش شفى المرضى، حيا الموتى، وخرّج الجنون، حيّد إبليس باش يسرق مملكته ويحرر العبيد المحبوسين. حيث كان الله معاه، نجا يسوع كاع الناس لي كانوا تحت القوة ديال إبليس.

القوّات ضنّو: «إلا قتلنا ولد الله، غنقويو السلطة ديالنا فهاد الدنيا.» ولكن العكس لي وقع. الموت ديال يسوع المسيح كان الضربة القاضية ديال قوّات الشرّ. الموت ديال المسيح على الصليب حيّدات القوّات والسلطات الروحية وغلبهم كدّام كلشي. وبين الله القوة دياله باحسن

طريقة مَلِي بعت يسوع من الموت. ومن بعد ما تبعت يسوع من الموت وترفع للمكانة ديال القوة والسلطة فوق كَاع الرُّؤسا والسلطات.

النَّاس خاصَّهم يتوبو من القوَّات المضلِّمة ويخضعو للرَّبِّ يسوع. المومنين بيسوع كيتَّجابو من مملكة الضَّلام لمملكة النُّور. كيرفعنا الله مع المسيح وكيكَلِّسنا معاه فالسَّما باش يكون عندنا حتَّا حنا القوَّة والسلطة فوق كَاع السلطات. نعمة الله كترجَّع مكانة السلطة ديالنا. حنا الورتة مع المسيح.

بالقوَّة ديال روح الله لي عندنا، كنتبتو ضد الشَّيطان. واخا الشَّيطان باقي كيصور بحال شي سَّبَّع كيقَلِّب على الفريسة، يسوع كيجمينا من التَّأثير المشرار ديالُه فاش كنتبتو فالهوية والسلطة فولد الله الممسوح. كيبارك الله المسيحيين بكَاع البركات الروحيَّة من السَّما لي كتبطل السَّحر. مَلِي كنعيشو فالإيمان والمحبة بروح الله، كنغلبو العدو وكنحيدو الدُّنوب لي كنتستعبد. الحرب غتكَمَل مَلِي الله غيكتَف القوَّة ديال الشَّيطان وغيحكم العالم من العرش ديالُه على الدَّوام مع الشَّعب ديالُه.